

## NONO RUDI PESCADOR

Quando mi e mio fradel ierimo pici, ogni sera papi ne contava dele storie de quando iera lui picio. Dopo che se gavevimo sistemado in leto, el vegniva, el se sentava in meso a noi due e el diseva: "Spete che penso...ve go za contà la storia de nono Rudi, de quando che el andava a pescar?" Tante volte noi disevimo de no anche se el ne la gaveva za dita. Anche se la gavevimo scoltada per la decima volta, la ne iera ancora sai divertente e interessante. Allora el scominsiava: "Quando nono Rudi iera giovane, el andava tante volte a pescar con i suoi amici. Ma iera de rider con 'sto Rudi...Un giorno i se meti d'acordo e i va a pescar. I se riunisi al'imbrunir per andar a levar le nase. Nono Rudi iera proprio specialista per pescar con le nase. In inverno le costruiva in conserva, cusì che in primavera le iera pronte. Con due sui amici i monta in tela batana, a remi i riva sul posto. I buta la grampinela e dopo un poco i ciapa la prima nasa. I la tira in barca e duti sorpresi i vedi che la nasa xe zvoda. I la cala in mar e i tira su un'altra ma anche quella xe zvoda. Allora i sui amici i comincia a lamentarse che come mai 'ste nase xe dute zvode. I tira su tute le nase e anche quele le xe zvode e i trova solo qualche sepa. I amici i iera sempre più nervosi e rabiadi. Nono Rudi li calmava disendoghe che no iera luna bona , che iera fele e che el mar iera ancora troppo freddo. Dopo gaverle levade tute, i torna a riva con un per de sepe in stagnaco. I se saluda e i va tuti a casa.

E adeso riva el bel! Come mai che tute le nase iera zvode? El giorno prima, de note nono Rudi el iera andato a tirarle su tute zvodandole. Dentro iera tanto pese che el gaveva dovuto far tre viasi per portarlo tuto a casa. Ma iera un altro problema: tuto quel pese no lo poteva vender che no vegnisi fora storie con i amici. No lo poteva gnianche magnar perché ghe ne iera per vero troppo. Savè che fine ga fato el pese? Co iera el periodo de seminar patate, in tei avaroi, visin de ogni patata iera un pese per ludame."

Ancora deso ghe son più grande, me piasi ricordarme de tute queste storie dei veci de una volta che ne contava mio papà co ierimo pici.

La vita de una volta iera dura, ma anche tanto divertente.